

## ¡O MUNDOKO DENPOREA!

Ikusi neban bein bada  
Gabez lotan nengoala,  
Egar agura guztizko zar bar  
Usoa legez joiala;  
Zer zan nik ez nekiala,  
Itandu neutsan ¿norzara?  
Erantzun eustan «beti joan ta  
Biurtuten enazana.»

Sustoz iratzarri nintzan,  
Zer bear ete zan izan  
Agura arek esan eustana  
Biotzean sartu jatan;  
Zelan joan zeitekean  
Urrinduaz beti egan,  
Geiago onuntz itzuli baga  
Ezin asman izan neban.

Gauza guztiak jirea  
Eukala neukan ustea,  
Gaur Eguzkiak iges ein arren  
Dauka biyar etortea;  
Amaitutean urtea,  
Barriro dator bestea,  
Mundua sortu zanik geiago  
An da betiko kantea.

¡Esan ezkutapentsua!  
Agiureak aitatua,  
Asman ezinda gaba guztia  
Irago neban osua;  
Zer zan ez biurtzekua  
Atera, ezinik kontua,  
Neure buru au egunerako  
Jarri jatan zoratua.

Aztertu eta aztertu  
Ustez neban nik aurkitu,  
Etzan ikusi neban gauzea  
Ez gizon, ez ta aingeru,  
Ta gichiago deabru,  
Orretan nago seguru,  
Gaiztoen antzik inondik bere  
Ez neutsalako asmadu.

Nozbait bururatu jatan  
Zelan guztizko zarra zan,  
Adanek aña urte beukala  
Ziertu daiket nik esan;  
Agaitik modu orretan  
Nai ta ez bear ak izan,  
Denporean irudi bizi  
Gizon zar baten ichuran.

Egiten dabeela jira,  
 Gau-egunak ikusi da,  
 Baña denpora joandakorik  
 ¿Noz atzera etorri da?  
 Neure begiak begira  
 Ezker eta eskubira,  
 Nire guraso izan ziranak  
 ¿Egun onetan nun dira?

Joan bai, ta etorri ez,  
 Askorentzat da uts legez,  
 Denporak iges egiñagaitik  
 Damurik artu baperez;  
 Au etorri aren berez,  
 Ezin geratu indarrez,  
 Ez irabazi bein galdu bazan  
 Urtuagaitik negarrez.

¡O munduko denporea!  
 Zure balio andia  
 Bardinduteko ez dira gauza  
 Ez zidar eta urria;  
 ¡Askoren maitegarria!  
 ¡Enetzat bildurgarria!  
 Zara zorion edo charrera  
 Garoazuzan zaldia.

FELIPE ARRESE TA BEITIA.

